

Decima Urbs

H E N G C H E V.

Undecima Urbs

C H A N G T E.

Situs.

Ching amnis Australia hujus urbis moenia lambit, à quo & Siang fluvio ad peninsulæ modum pars territorii clauditur: montibus non caret hæc regio, sed plerumque non horridi sunt, ast culti & amœni, præterquam quod fere omnia ad vitam traducendam necessaria habeat, abundat etiam perdicibus, multa papyro, Talco, aliisque; argenti fodinæ ditissimam eam redderent, si tantummodo licitum esset illas aperire. fuit olim regni Çu, Hana familia Queiyang vocavit, U Rex Siangtung, T'anga Hunan, hodiernum nomen ab Regibus Leang inditum Taiminga familia restituit; habet urbs sub se civitates novem, nimirum, 1 Hengcheu, 2 Hengxan, 3 Luyang, 4 Changning, 5 Gangin, 6 Ling, 7 Queiyang, 8 Linuu, 9 Lanxan.

Montes.

Taceu mons ad urbis occasum argento abundare creditur à suis, olimque in eo fodinas apertas fuisse scribunt. Heng mons prope Hengxan incipit, & octingenta stadia occupat; duo supra septuaginta in eo vertices numerantur, decem ingentes cavernæ, octo & triginta fontes aquarum, viginti quinque torrentes. Prope Luyang mons ingens est Heuki, qui ad septuaginta numerare vertices dicitur. Ling civitas vicinum habet montem Vanyang, qui trecenta occupat stadia, totus annosis sylvis virefcit. Xeyen mons prope Queiyang est, lapidea hirundo dicitur, quippe in eo post lapsas pluvias lapides inveniunt, omnino hirundines referentes, imo inter eos mares & foeminas ex colorum varietate medici distinguunt, & ad medicamenta conficienda adhibent. Hoayn mons pulcher adpectu Linuu & Lanxan civitatum territoria ingreditur, ob raram ejus pulchritudinem & amœnitatem florem vocant.

Flumina.

U amnis ex Jung urbe procedit, & ad Changning civitatem transit. Ching amnis ad urbis Boream fluit, ejus origo ad ortum Paoking urbis in montibus est. Est etiam ad ortum urbis lacus aqua profundissima plenus, sed viridi colore imbuta, hanc ad Sinicum potum seu vinum ex oryza conficiendum aptissimam ajunt.

Situs & qualitas.

IAcet Changte urbs inter flumina, magnumque lacum intercepta ad Borealem ripam Juen fluvii, qui inibi in lacum aquas suas exonerat. tota fere urbs ipsaque Regio ubique navibus pervia est, parva quidem spatium, sed amœna prorsus ac ferax, quæque rerum ubertate ac præstantia facile multis antecellat; incoluit etiam hanc urbem Rex ex Taiminga familia, cujus superbium palatium continet urbs, regitque civitates quatuor, quarum 1 Changte, 2 Taoyven, 3 Lungyang, 4 Juenkiang. Sub Xanga & Cheva familia, priusquam Sinico subiceretur imperio hanc regionem habitavere Manyen populi, sed Çu Rex occupavit, & regibus extinctis à Cina familia Kiuchung nomen habuit, ab Hana Vuling primum dicta; at postquam perfidus Hiangyvus Regem Çu occidit, quia populus hujus urbis sortem regis sui miseratus, illi iusta magno omnium ordinum luctu persolverat, tum eadem Hana extincto Hiangyvo Iling civitatem dixit, quod justitiæ terram significat. ab U regibus Vucheu dicta est, recens nomen quod jam obtinet T'anga imposuit familia: tria nobilissima fana numerat, & lapide lazulo abundat, manna ibi quoque colligitur, poma aurea omnis generis profert, inter quæ illa sunt, quæ hyberna à Sinis vocantur. cum enim jam cessant reliqua, hæc primum hyeme maturefcunt, & suavissimi sunt saporis: habent etiam cedros illas, quas idoli manum vocant, extremitates enim illarum in caudulas aliquas ceu in digitos ac pedunculos desinunt. esui apti non sunt, at domi intra cubiculum suspensi suavissimum exhalant odorem, quamobrem sacculos reticulato opere ex serico artificiose contextunt.

Montes.

Mons Lo, hoc est cervorum, quia illis abundat, ad urbis occasum est. Taoyven civitas montem habet Lolo vicinum, ex laudatis in Taosu libris ordine quadragesimus secundus est. Versus urbis Barrolybicum ingens caverna est Lungmuen dicta, antequam pons est ex monte ad montem ab ipsa natura protensus, omnino quadratus, adeo ut unum latus ad duo fere stadia extendatur, sub eo torrens est.

Flumina.

Tungting lacus Lungyang, & Juenkiang civitatum terminos attingit: ibidem